



Tir Yimym

www.tirymym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymym@gmail.com

TAPAK 8

Yangia anidakangma :



Tir Yimym



tir_yimym



tir yimym

TAPAK 7

Djokovic-i ATP Masters 1000 asaya timtiba akokba asayar kümogo

South Korea court-i PM Han Duck-soo nem tir menden meyipa agütsü



VOL. XXII ISSUE NO. 160 (ADOK 160) DIMAPUR SANGTENNÜ TUESDAY METSÜREMI (MARCH) 25, 2025 ₹ 5.00

Nagaland Solar Mission mezüngbuba senden menogo

Dimapur, March 25, 2025 (TYO): Chief Secretary Dr. J Alam menden ser Nagaland Solar Mission indang mezüngbuba senden menogo.

March 24, 2025 nü Chief Secretary indang Conference Hall nung senden amen aser PM Surya Ghar Muft Bijli Yojana indang lemsatep. Iba scheme ajanga Nagaland nung residential households nung Rooftop Solar enoktsü.

Prime Minister Narendra Modi menden ser Union Cabinet-i February 29, 2024 nü PM Surya Ghar: Muft Bijli Yojana tenzüka liasü.

Iba scheme kübok linük nung kilen crore 1 nung rooftop solar enoktsü aser iba ajanga ita shia 300 units tashi electricity angati agütsütsü.

Iba scheme kübok consumers-i lesser grid supply enokba ajanga RTS installation nungi tjangzüük angutsü aser iba ajanga monthly electricity bill ajema akümtsü.

Talisa RTS system enokba

nung senotsü tajemba endokdaksütsü atema India sorkari 1KW nungi 3KW atema 60% nungi 54% subsidies agütsütsü.

India sorkar subsidy den yariteptsü atema Nagaland sorkari 1KW nungi 3 KW atema additional state subsidies 36 % nungi 31% agütsütsü lemtetogo.

Iba mapa atema Financial year 2025-26 tsünga Rs.10.00 crore lezmütsüogo. Centre aser state sorkartem maparen kübok Rooftop Solar ya jenjang dalangba akümtsü aser total subsidy 96% (up to 2KW) nungi 85% (up to 3 KW) tashi asütsü.

Iba Scheme mapa inyaka aotsü atema Directorate Level nung Solar Mission Team aser Secretariat level nung Solar Mission Cell tentetsü.

Tanü Nagaland Solar Mission mezüngbuba senden nung Finance Commissioner, Secretary Power, Engineer in Chief, Power aser Power Department nungi tanga ketdangsürtem aden.

Kohima district nung yimtsüing 12 TB-free kümogo

Dimapur, March 24, 2025 (TYO): Tanü World Tuberculosis Day 2025 amungdang Kohima kübok yimtsüing 12-i tuberculosis (TB) anema mapa tajung inyakba ajitetogo.

Nagaland nung mezüngbuba 100% TB-free district akümtsü alizüing yur inyaka arudang yimtsüing 12-i 100% TB-free jenjang tongtetogo.

Tanü Kohima Deputy Commissioner, B. Henok Buchem, NCS-i yimtsüing ajak nem tenüngsang agütsü.

TB samatsütsüba ya sorkar mesüra medical professionals tebilemtsü khuret dang masü saka kija aser yimtsüing shiai külemi inyaksüba mapa ka lir ta pai ashi.

Tanüingba yimtsüingtemi yimtsüing 12 nungi tatishitsü agütsüla aser parnok yimtsüingtema TB-free kümdaksütsüla. Taruba küm ka tsünga yimtsüing teimba akümtsü imlar ta DC Buchem-isa ashi.

Buchem-isa tetsü nurse ka ama inyaka aruba bilemteta jembidang la temang nung timtemtem liaka lai manemertem anepalu ta ashi.

Lai bendanga agüja tenzüka ajanga pa nem tangatetba agütsü aser mapa dang masü saka mission ka aser temaba nükjidong ka atema inyaker ta temulungtetba agütsü ta DC Buchem-isa ashi.

Iba sentong ya "Yes! We Can End TB: Commit, Invest, Deliver" omen nung ajemdaker agi aser District Tuberculosis Officer, Dr. Chibenthung Kithan-ia tesentepertem dang alima nung kanga kara menatepba tashidak rongnung TB ya ka lir saka mapang

shitak nung puteta anepalura taneptsü angur ta metetdaksü.

Prime Minister Narendra Modi'er TB Mukht Bharat Abhiyaan nung shilem ka ama Nikshay Mitra ajanga TB shirangertem nem nutritional, vocational, mesüra diagnostic assistance agütsütsü ajungmesoa mapa inyaker.

Nagaland nung kanga dang bendanga agüja Nikshay Mitra inyakerji Department of Veterinary & Animal Husbandry Joint Director Dr. Amenla Walling lir. Lai TB agi shirangertem maneni dang yariyonga arur.

Lai Mokokchung nung aindang TB agi shirangertem kanga tsüba aser balaka yur anepaluba anguba bilemteta jemb. Parnoki taneptsü anguba sülen-a tangar dang nungi balaka ayu ta lai ashi.

Tesüiba nung TB agi shirangertem balaka benshiba ajanga tangatetba balaka liasü aser senzüka amshi, saka education aser awareness ajanga TB ya noktangteter aser anepalu süteter ta angatet ta Dr. Amenla-isa ashi.

TB Mukht Panchayat initiative kübok TB-free criteria atongba yimtsüingtem nem World TB Day nung certificate ka aser Mahatma Gandhi kürakyanglu ka agütsü.

Taküm Seiyha Phesa nem silver statue aser tanüingba yimtsüing 11 nem bronze statue agütsüogo.

Kohima district kübok TB-free yimtsüingtemji Mezo Basa, Tseisema Bawe, Gariphema Bawe, Tuophe Phezou, Tseimekhumma Bawe, Seiyhama, New Terogvunyu, Z. Likwenchu, Tsonsa, Sewanu, aser New Tesophenyu lir.

Council of Naga Cooperation and Relationship akangshitsü bangjemtep



Dimapur, March 24, 2025 (TYO): Naga nunger külem yimtenren taginüba atongtsü atema Naga kin teloktem, Naga Political Groups (NPGs) aser Forum for Naga Reconciliation (FNR) tsünga kanga dang tongtipang senden ka menogo.

March 24, 2025 nü senden amending Council of Naga Cooperation and Relationship (CNCR) den yariteptsü aser akangshitsü telemteba agiogo.

January 14, 2025 nü NPGs-i CNCR nung sign sütepa lir aser

iba nung Naga kin teloktemi official participants ama adentsü lemtet.

Naga sobaliba kin teloktem, NPGs aser FNR tsünga April 22, 2025 nü taruba senden amentsü aser iba senden nung NPGs nungi tematiba mendenpurtem adentsü mepishia metetdaksüogo.

CNCR nung lateta aliba ama telok ajaki iba maparen nung yariteptsüla aser Naga nunger shiai asen külemi alizüing atongtsü atema inyakba mapa

asoshi sarasademtsü aser nungitta yaritsü mepishir ta Naga kin teloktem, NPGs aser FNR ajanga metetdaksüogo.

Iba senden nung FNR aser NPGs dak alia Ao Senden, Angami Public Organisation, Chakhesang Public Organisation, Lotha Hoho, Sumi, Hoho, Rengma Hoho, Pchury Hoho, Tangkhul Union, United Naga Council, Mao Council, Tangkhul Naga Hoho, aser Zeliang People's Organisation Dimapur nungi teshimtet nübotem aden.

Union Minister-i CSS Post Matric Scholarship agütsütsü nangzük

Dimapur, March 25, 2025 (TYO): Union Minister for Tribal Affairs, Government of India, Jial Oram-i Nagaland nung ST student beneficiaries nem CSS Post Matric Scholarship (2023-24) atema Central Share final installment agütsütsü nangzükogo.

March 24, 2025 nü Higher Education & Tourism, GoN

Temjen Imna Along-i New Delhi nung Jial Oram den ajurutepa senden amending iba ya nangzük.

Imna Along-i Union Minister Oram dang Nagaland nung ST student beneficiaries nem CSS Post Matric Scholarship agütsüba osang metetdaksü.

Paisa Oram dang financial year 2023-24 atema final

installment Rs. 1274.01 lakhs agütsütsü mepishi.

State sorkar nem funding agencies-i installments 3 nungi pezü lemsar agütsüba inyakyim ya meyipa reprangshima ST students ajangzüksü atema single installment nung agütsü nung ajungtsü ta Minister Along-isa Union Minister Oram den tebilemba lemsatep.

NPCC-i healthcare system tajungba kümdaksütsü ayongzüker

Dimapur, February 25, 2025 (TYO): Nagaland nung healthcare system kanga mejungi kümogo aser tongtipang onük anaji- basic medical equipment maliba aser healthcare professionals peria maliba lir ta Public Grievances Department, NPCC Chairperson Engineer Meshenlo Kath-i ashi.

Nagaland nung mozü ki aika nung CT scan machines aser mammograms amala tang nungdakba medical equipment peria mali ta Meshenlo Kath-i ashi.

"May 4, 2024 nü onoki Naga Hospital Authority, Kohima dang tekaratiba nung CT scan aser mammogram facilities mapa tenzüksü ayongzük. Ajisüaka tanü tashi item essential services mebenshir" ta pai ashi.

Nagaland yimtiba Kohima nung CT scan facilities maliba ajanga shirangertem private hospitals mesüra meta talangi diagnostic tests atema aotsüsa akümer ta Kath-isa ashi.

"Zunheboto ama district tem nung CT scan facility mali. Meta talang pilar alirtem scan asütsü atema kilometer 150 shi aotsüsa akümer" ta paisa ashi.

"Tanga northeastern state tem kümteta maodang nungi Nagaland-i state jenjang angu saka

asenoki healthcare infrastructure nung tanga state tem memener. Asenok dang nungi menur state akümba Manipur aser Meghalaya amala state tem nung healthcare jenjang tajungba süra asenok kechi agi kangshir?" ta Kath-isa asüngdang.

Külen, Nagaland nung doctors aser medical staff peria mali aser Primary Health Centres (PHCs) 57 nung doctor ka danga mali inyaksangshir. PHC shiai yimtsüing 15-20 shi repranger saka PHC 57 nung doctor ka danga mali. Item amala yimtsüingtem nung shirangertem koloni aotsü? ta Kath-isa asüngdang.

State sorkari tim mesüi ketdangsüba aser policy tajung meyangluba ajanga medical professionals maniokteter. Sorkari associations aser unions dak tai tongloktsür saka tebilemtsü chichibaji recruitment policies nung metokmeperi aliba ajanga lir, ta paisa ashi.

Nübertem asoshi tongtipang onük kaji doctors, nurses, technicians, aser radiologists 288 shimoktsü atema special recruitment drive lir. COVID-19 mapang healthcare workers nem tim mesüi tajangzük agütsüba ajanga nübertem recruitment drive anema noktaker ta Kath-isa ashi.

Sorkar indang policy ajanga Covid wara mapang inyaker nem 175 marks agütsü aser ibaji tatidang magidang total score nungi 36% lir. Iba ya kangasa tim masüba inyakyim ka lir ta paisa ashi.

Manipur nung COVID-19 workers nem 10 extra marks dang agütsür anungji Nagaland indang policy ya Indian Constitution nung Article 16 aser NPSC Rule No. 9, Clause 4 anema lir ta Kath-isa ashi.

"2020 nung sorkari 186 contract-based posts atema advertisement agütsü aser iba nung parnok ya ita 12 atema dang shimoker aser regularization atema temsüa mali ta jangjangja shia liasü. Ni COVID mapang inyakertem anema menoktaker aser parnok mapa tajung inyakogo, saka sorkari recruitment policies timi inyaksüla aser mapa tazüingtem nung tashishitep melii nisungtem shimoktsüla" ta paisa metetdaksü.

Nagaland sorkari healthcare ya zübazüba mebilemtsüla aser state kübok tesem balala nung essential medical equipment aser staff peria agütsütsüla. Timi anepaluba masüba ajanga nisung takümtem melaludang sorkari healthcare system yanglushitsüla ta Kath-isa ashi.

Phom oshi nung shisatokden aka



Longleng nung Department of School Education Longleng, Phom People Council aser Phom Baptist Christian Association semtepa Phom Literature nung shisatokden sentong agir kelen sentong nung shilem agirtem tangokba noksa.

Mokokchung, Metsüremi/ March 24(TYO): Tanu Department of School Education Longleng, Phom People Council aser Phom Baptist Christian Association semtepa Phom Literature nung shisatokden sentong ka Phom Baptist Church, Executive Hall Longleng nung kaogo.

Iba sentong nung Oshio ben tongtipang ta asüba onük Vice

Principal, Yingli College Dr. B. Henshet Phom ajanga jembiba den ano Secretary, Phom Literature Board, Bongshen Phom aser Phom Literature Board member P. Henyie Phom tenatia zülumen(spellings) koda shitak amshitsü iba indang teratet tejangja Power Point ajanga lemsatepa liasü.

Phom Baptist Churches

Association nung Secretary Tialemba Phom ajanga Tsüngrem lenisüba jazüka sarasadema sentong tenzükbade DEO Longleng, Tinumayang aser Phom People Council President Y.B. Angam Phom tenatia shilem agia jembiba den Phom Literature Board züngsem Chingleü Phom ketdangsüba nung sentong ania liasü.

Two Wheeler Taxi atema metetdaksür

Dimapur, Metsüremi/March 24 (TYO): Office of the Secretary, Regional Transport Authority, Dimapur ajanga February 25, 2025 nü metetdaksüba ama Chümoukedima district kübok two-wheeler taxi permits atema application agütsür tenüng shimteta March 25 & 26, 2025 anogo nikonkdang 2:00 ako nungi tenzüka Inter-State Truck Terminal Complex, Chümoukedima, (District Transport Office) nung tsünglanglen shia aliba ama driving test agütsü, ta Deputy Commissioner, Chümoukedima ajanga sangdong ka nung metetdaksü.

March 25, 2025 nikonkdang 2:00 ako nung drive test agütsüpurtem: Tsheku, Meceivi Ki, N. Lichanthung Tungoe, Tovikato Achumi, Nzanthung Lotha, Shanchothung R Humtsoe, Sentiwapang, Youlem, Libenthung S Kikon, Iloka Achumi, Songmo Mansa, Imtiningkum, Kheka, Kehodi Yoho, Sahuto Keyho, Zapuvizo C Khroitsu, Keviselie C Khroitsu, Along Ao, Sakomeren, Wekupe Therie, Wonchibeni Lotha, Kitoka Sumi, Keveletuo Nagi, Bidusuto Zecho, Levi Puro, Yenwang N Konyak, Ongwang N, Kedukhul Metha, Viphreto Tetso, Shikavi Sumi, Monglong, Khrieketoulhou Punyu, Amenba Tzudir, Thepfukedo, Joseph Chishi, Neihu Dzuvichu, Neilhoutuo Venuh, Venetolu Tetso, Khrunielu

Rhakho, K. Tovato Achumi.

March 26, 2025 nikonkdang 2:00 ako nung drive test agütsüpurtem:

Alohitto Achumi, Megotou Savino, Mhasengoi Keyho, Vihutuo Tsukru, Keviwetuo Savino, Lerovi Chielie, Avi Roque Chase, Khrieketoulhou Punyu, Neikerhezo Metha, Chonchithung Tungoe, Ruokuovilie Mere, Weku Wezah, Lhikeyie Elah, Ekithung M Ngullie, Nuvoto Lohe, Haothang Singson, Kevizhapu Terhuja, Kevilhoutuo Nagi, Vemese Chiezu, Neichubeilie, Menokhrilie, Thejasevor Kruse, Rokozhazo Kruse, Kevimese Vupru, Rokokhotuo, Sungjemen, Supongsashi Longkumer, Thepfukuolie Sanchu, Tekalong Aier, Hovise Naleo, Shurhotsilie Theunuo, Kelhousesilie Kin, Mhathung Patton, Abemo F Kithan, Keneiseto Savi, Talimen Amri, Vireto, Joshua Angami, Imlipenba, Orentsamo Kinghen, Wonchithung Kinghen, Y Sheao Konyak.

Shimteta aliba applicants temi test driving mapang two-wheeler (scooty)/helmets den driving license (original) bener arütsüla, ta sangdong ajanga ashi.

Shimteta aliba applicants temi pei nem lezmütsüba anogo aser mapang Vileto Natso (Ph. No. 9612774469), Motor Vehicle Inspector den tongteprateptsü metetdaksü.

State nung World Tuberculosis Day mungogo



Dimapur

Longleng

Dimapur, Metsüremi/March 24 (TYO): Alima ajunga den külemi Nagaland nunga district balala nung March 24, 2025 nü World Tuberculosis Day munga liasü.

DIMAPUR: Dimapur nung World Tuberculosis Day cum DAPCC and Vertical Programs Meeting ka "Yes, We Can End TB! Commit, Invest, Deliver" omen nung ajemdaker CMO Dimapur indang Conference Hall nung March 24, 2025 nü agia liasü.

Iba sentong nung Deputy Commissioner, Dimapur, Dr. Tinojungshi Chang, NCS ajanga jembidang sorkari region nung Tuberculosis (TB) samadaksütsü atema inyakba lemsatepa liasü.

Iba tashidak samadaksütsü asoshi inyakba nung yaritsü sorkar renema lir ta ashi aser yimtsüng 19-i shilem tajung agia dangar nema TB awareness agütsüba ashi.

TB ya ajaki meranga inyakra grassroots level nung samatsütettsü, ta Dr. Chang-i ashi aser Village Development Boards (VDBs) aser village councils tem dang TB anema yakyaka raratsü ayongzü.

TB agi shiranger atema sorkari mozü angati agütsür aser senotsü teyaria agütsür, anungji lenirtemi nüburtem nem item maongka agidaksütsü ajungshitsüla, ta

ashi.

Sentong nung Chief Medical Officer, Dimapur, Dr. T. Temsu Lkr-i TB samadaksütsü asoshi maneni senotsü indoktsü aser bendanga agütsür inyaktsü nüngdak ta ashi aser nüburtem dang akokba lenmang nung yahrteptsü ayongzüka liasü.

Chief Medical Officer, Chümoukedima, Dr. Yartenla Jamir-i pela agizükba o jembiba sentong tenzüka aser iba sülen TB Muk Panchayat (TB-free villages) Awards den healthcare staff nem tepela temaitsü kulizüng kakat tem agüja liasü.

NTEP (National Tuberculosis Elimination Program), NVBDCP (National Vector Borne Disease Control Program), aser DISHA densema vertical program indang inyakym balala sayua liasü. TB tashidak nungi taneptsü ngur alirtem rongnung Monica ajanga takum kuli agütsü.

Sentong nung Dr. A. Kavito Zhimomi, DPO CD-1 menden liasü aser DISHA nungi Orenthung-i melepzüng o jembiba liasü.

TUENSANG: Tuensang nunga World Tuberculosis Day ya March 24, 2025 nü "Yes, We Can End TB! Commit, Invest, Deliver" omen nung ajemdaker Town Hall, Tuensang nung amung. Iba

sentong nung Deputy Commissioner, Tuensang, Lithrongla Tongpi Rutsa sentong akhumdong ka ama dena liasü.

Lai iba sentong nung jembidang TB Champion ajanga par tajangshiba lemsatepba atema pelaba metetdaksü.

India nung TB tashidak ya 2025 tashinung samatsü nükjidong lir, saka Tuensang District nung tesüba küm ka tsüngta nisung 251 dak TB putetba ya district asoshi tebilemtsü lir, ta lai ashi.

Nüburtemi zübazüyima malitsüla aser TB agi shiranger yaritsüla, ta Rutsa-i ashi aser nüburtem, NGOs aser sorkar mapa inyakertem dang district nung TB agi shiranger nem chiyongtsü alitsütsü asoshi senotsü bendentsü ayongzüka liasü.

Iba sentong nung SMO DH Tuensang, Dr. Alemba R Jamir-i tayongzüka o jembiba, Hanso TB Champion ajanga Yes We Can, TTBL ajanga drama ka aser Mitra certificate nung agütsüba liasü. Sentong nung Changsang Yanchu menden liasü aser Dr. Imlinano DPD (CD-II) ajanga melepzüng o jembiba.

NOKLAK: Noklak nung Word Tuberculosis Day ya Chief Medical Officer, Noklak indang Conference Hall nung

munga liasü.

Sentong akhumdong ama Deputy Commissioner, Noklak, Arikumba, NCS ajanga jembidang, alima nung TB ya tashidak tejentiba rongnung ka lir aser alima nung iba tashidak samadaksütsü nükjidong nung iba anogomung amunger, ta ashi.

District nung administrator ka ama mozüki dangi nüngdakba medical facilities bener arutsü pa mapa lir ta ashi aser sentong nung adener dang medical department den yariteptsü ayongzü.

District nung TB agi shiranger senotsü nüngdaka alir nem Noklak DPDB ajanga senotsü teyaria agütsütsü, ta pai ashi.

Iba tashidak anema raratsü ya nisung ka kija tebilemtsü masü arok tebilemtsü lir, ta pai ashi aser nüburtem nem iba tashidak angatetdakja awareness agütsütsü ayongzüka liasü.

CMO Noklak, Dr. Victor NC ajanga TB agi shirangba yimya aser menatepa aoba indang rasaa ashi aser TB mozü sorkari angati agütsür aser TB agi shiranger noklang nung noklang shilem taneptsü angur, ta shia liasü.

Dr. Victor NC ajanga TB agi shiranger ana adopt asüba atema DC nungi tepela temaitsü kulizüng kakat agüja liasü.

LONGLENG: Longleng nunga March 24, 2025 nü World Tuberculosis Day ya VCC & VDB Conference Hall, Longleng nung munga liasü.

EAC Longleng, Pipfusa Pojar, NCS ajanga sentong nung adener ajunga dang district, state aser linük nungi iba tashidak samatsütsü asoshi kasa khuret bena inyaktsü ayongzü.

Tuberculosis ya menatepa aoba tashidak tamajung rongnung ka lir, aser iba tashidak samatsütsü nükjidong nung Government of India-i sentong balala yanglua inyaker, ta lai ashi.

District Administration-i Longleng ya TB maliba district ka kumdaksütsü asoshi bendanga agütsür inyaker, aser iba nükjidong atongtsü asoshi government agencies, civil society organisation aser nisung ajaki shilem agütsü nüngdaker, ta Pojar-i ashi.

Laisa nüburtem dang TB tashidak alirtem sempaa mamshitsü aser anepalua yaritsü ayongzü.

DPO Dr. Temsusashi ajanga iba anogomung ratet ashi aser Senior Treatment Specialist, Tongang ajanga TB awareness indang jembiba liasü.

Yingli Mission Society Longleng aser TB Champion nungia o tatsütsü jembiba liasü.

EAC Longleng, Pipfusa Pojar-i TB Muk Panchayat sempet agütsü aser CMO Longleng, Dr. Tiasunep-i Best performing ASHA awards agüja liasü.

Iba sentong nung PMDT Supervisor Meribeni menden liasü aser TB Health Visitor Henmei Phom-i melepzüng o jembiba.



Bhubaneswar, March 24, 2025: Hombarnü Odisha assembly nung budget senden amendang Congress aser BJD MLA temi longkak aitba noksa nung angur.

DelhiCMRekhaGupta-i assembly nung DTC indang CAG report benok

New Delhi, Metsüremi/ March 24 (Agencies): Hombarnü Delhi assembly nung Chief Minister, Rekha Gupta-i Delhi Transport Corporation (DTC) indang Comptroller & Auditor General (CAG) report benokba sülen ruling BJP aser opposition Aam Aadmi Party (AAP) na sashia aitsütepa liasü.

Külen AAP-i, BJP sorkari state budget jakdang economic survey memetetdaksüba atema BJP aitsü aser BJP-ia taoba mapang AAP-i DTC takoksa ngudaksüba atema AAP aitsü.

DTC indang CAG report nung DTC inyakyim nung metokmeperi aika aliba aser ibaji ajanga senotsü aika takoksa anguba metetdaksü.

CAG report benokba sülen BJP MLA Harish Khurana-i taoba mapang AAP sorkar aija, AAP-i public transport system tim mesüi ketdangsüba ajanga senotsü aika takoksa nguogo, ta ashi.

Ano külen assembly nung opposition lenir Atishi-i, "BJP sorkari budget koma benoktsüar meteta ali asü?" ta asüngdang.

AAP lenir, Atishi-isa, "Budget mebenokdangyongi tamasa Economic Survey benoker aser iba sülen ang budget benoker, ajisüaka BJP sorkari yamaji meinyak. Economic Survey mebenokba dak sendakba nung Chief Minister-i, 'audit report malibayong economic survey

mebenok' ta ashi. Ibaji khenyongi tai. Onoki iba onükji süoktsü merang ajisüaka senden nung iba atemaji o lemteptsü asoshi temelaba magütsü. Kechiba sorkari Economic Survey mebenoker?" ta asüngdang.

BJP sorkar maneni aija Atishi-i, "Ni Chief Minister Rekha Gupta dang ya asüngdangner- Kechiba senden nung Economic Survey mebenok? Mimshitsüsa Economic Survey nungji kechi ali? Rekha Gupta-i Economic Survey ji züngdangner asü? Economic Survey medeni budget koma renem?" ta asüngdang.

Delhi budget senden ya March 24 nü tenzükogo aser March 28 nü tembangtsü.

Jharkhand nung caste nung ajemdaker survey agitsü: Deepak Birua

Ranchi, March 24 (Agencies): Taruba financial year nungsa Jharkhand nung caste nung ajemdaker survey agitsü, ta Hombarnü state assembly nung minister kati metetdaksü.

Iba survey agitsü atema Personnel department nem mapa lemozüksüogo.

Congress MLA Pradip Yadav-i asüngdangba langzüdang Transport, Revenue & Land Reforms department minister Deepak Birua-i,

"Taruba financial year nungsa sorkari state nung caste nung ajemdaker survey ka agitsü. Yaküm February ita nung iba atema ya telemetba agia liasü. Iba survey agitsü atema onoki inyaksü," ta metetdaksü.

Minister-isa, iba survey agitsü atema nisung kwi nüngdaksü aser senotsü kwi indoktsüar item ajakji asadangtsü atema March 4 nü department-i agency ka 'hire' asütsü atema sangdong ka agütsüogo, ta metetdaksü.

Paisa, "Ni agency kar denbo jembidangogo, ajisüaka iba atemaji mapang agitsü," ta ashi.

"Telangana aser Bihar na nung survey agiba yimya nung taruba financial year nungsa survey agitsü atema sorkari meranga inyaksü," ta pai metetdaksü.

Congress MLA Pradip-i sorkar dang, Sarna nütsüng jangjatsü atema survey nungji Sarna religious code-a züngoktsüla, ta mepishia liasü.



March 24, 2025 nü Jantar Mantar, New Delhi nung INDIA teloktep den densema aliba student organisations nungi züngsemtemi National Education Policy (NEP) anema longkak aitba noksa nung angur.

India-i African linük 10 den 'Aikeyme' naval exercise agitsü

New Delhi, Metsüremi/ March 24 (Agencies): India-i tang mezüng Africa nung aliba linük 10 den 'Aikeyme' ta ser navy exercise ka agitsü, ta ketdangsertemi metetdaksü.

China-i Africa nung asalentong yanglur tesendaktep junga yanglur aliba mapang ka aser region nung Somali nunger tzüyim nung auertem aser Houthi telungpurtemi timtem agütsüba mapang ka nung India-i African linüktem den navy exercise agitsü.

Taruba ita Indian Navy-isa 'Indian Ocean ship (IOS) Sagar' mapatong tenzüksü. Iba mapatong kübok April 5 nungi May 8 tashi Indian Navy den bendang linük 9 nungi sepai 44-i INS Sunayna rong nung south-west Indian Ocean Region (IOR) nung senzütsü.

Hombarnü Navy deputy chief Vice Admiral, Tarun Sobti-i, "Tesüiba küm 10 tsüngda Indian Navy-i Indian Ocean Region nung aliba linüktem navies aser agencies den tesendaktep kanga junga yanglutetogo aser ibaji tzüyim nung security tajungba akümtsü atema lir," ta metetdaksü.

"March ita nung Ato kilonseri Mauritius semdangba mapang 'Mahasagar' sangdonga liasü. Aikeyme aser IOS Sagar ya security partner atema India ya tongtibang linük ka akümtsü asoshi aser Indian Ocean Region nung 'first responder' akümtsü nükjidong nung lir," ta paisa metetdaksü.

Somali nunger tzüyim nung auertem aser Houthi telungpurtemi timtem kanga agüja aruba sülen December ita nungi terabo süngjema kümogo, ajisüaka India nunger raraba rong ka Gulf of Aden aser temeket tesemtem nung maneni senzüdar, ta paisa metetdaksü.

Aikeyme (Africa-India key maritime engagement) exercise ya April 13 nungi April 18 tashi Tanzania kübok tzüyimkümlen Dar-es-Salaam nung agitsü.

"Iba exercise ya küm ana shia khenbosa agiba exercise ka asütsü tebilemba lir. Tangbo iba exercise nung Africa anüdoklen tsütsü aliba linüktem züngoker. Taruba exercise nungbo onoki Africa anüolen tsütsü aliba linüktem jaoktsü aser iba exercise ya tuluba kümdaktsütsü," ta Vice Admiral Sobti-isa metetdaksü.

Aikeyme exercise nung shilem agitsüpur linüktemji Tanzania, Comoros, Djibouti, Eritrea, Kenya, Madagascar, Mauritius, Mozambique, Seychelles aser South Africa lir.

Iba exercise nung VBSS (visit board search & seizure) drills, injang akahba, helicopter operations, samaba bushiba aser kümzükba densema alitsü.

Ano IOS Sagar kübok shilem agitsüpur sepai 44 Kochi nung training agidar. Sepai 44 ji Sri Lanka, Maldives, Mauritius, Comoros, Kenya, Madagascar, Mozambique, Seychelles aser South Africa linüktem nungi lir.

AIMPLB-i Waqf Amendment Bill anema longkak aittsü sangdonger

New Delhi, March 24 (Agencies): All India Muslim Personal Law Board (AIMPLB)-i Waqf Amendment Bill anema linük tesem ajaklen longkak aittsü, ta sangdongogo.

Parnoki Patna aser Vijayawada yimti na nungi tenzüka linük tesem ajaklen longkak aittsü, ta metetdaksü.

AIMPLB otongdar, SQR Ilyas-i iba bill anema nung aikati pusemba atema pelaba lemsatop.

Paisa, iba Bill anema tongtibang yimti aika nung longkak aittsü renemogo aser yimtenren party tema aikati shilem agitsü, ta metetdaksü.

AIMPLB Office Secretary, Mohd Vaquar Uddin Latifi-i, "March 17 nü Delhi nung longkak aitba sentong takok ngua agiba sülen All India Muslim Personal Law Board (AIMPLB)-i maneni Waqf Amendment Bill anema linük tesem ajaklen longkak aittsü," ta metetdaksü.

Iba Bill anema AIMPBL pusemba atema SQR Ilyas-i

Muslim organizations, lokti tentet balala, Dalit, Adivasi, OBC aser tanga minorities nungi lenirtem dang pelaba lemsatop.

"Allah tsüngrem aser item teloktem teyari medenibo Delhi nung longkak aitba sentong takok ngua magitetla," ta pai metetdaksü.

Paisa iba bill anema ola adokba aser longkak aitba nung shilem agiba atema opposition party tem aser MP tem den-a pelaba lemsatop.

AIMPLB Action Committee-i iba bill anema linük temzüng, legal aser democratic inyakyim ajak benshia nokdaksü telemtetba agiogo.

Iba bill anema March 26 nü Bihar yimtiba, Patna nung state assembly kima longkak aittsü aser March 29 nü Vijayawada nung assembly kima longkak aittsü.

Iba sülen Hyderabad, Mumbai, Kolkata, Bengaluru, Malerkotla (Punjab) aser Ranchi yimtem nunga iba bill anema longkak aittsü tebilemba lir, ta parnokisa metetdaksü.



TIR YIMYIM YIMOBILEM (EDITORIAL)

DIMAPUR TUESDAY, MARCH (METSÜREMI) 25, 2025

Lasüing benjong

Angami lima Khonoma nungertemi lasüing lu ayimba agi lasüing benjong tashi ayongzüktettsüsa aluyimtetbaji Naga nunger ajak asoshi tayongzüka tuluka asütsü. Lasüing ya alima nung alir ajaki kanga sapua achiba chiyongtsü ka lir, kechiyong iba ya temang asoshi mozü aketba chiyongtsü ka lir, anungji lasüing yagi teronem dang masü saka temang nung teyari tajung agütsür. Akhi tsürabur mapang, tanü ama tashidak tapu balala kokteta anepalutettsüsa mozü yangluteta makaba mapangbo tanü asenoki achiba süngolio aser aonsutsütem ya mozü ama amshia aru. Aji oda, tsüraburtem dak arem nung akaba süngolio aser süngjanglijangtem nung mozü aketba reprangtettsüsa ain aser shisatsü liasü. Aji oda, tanü tashitemetet putu nunga akhi tsüraburtemi nguteta achiba süngolio, aonsutsü aser süngjanglijang dak alaka tangabo machir. Atangji, iba ainji tanü science putu nunga tesüingmangtsüka bilemer. Akhi tsüraburtemi ngutetba mozü aketba chiyongtsü rongnung lasüing ya ka lir aser ibai Naga nungertem rongnunga Angami nungertemisa tesapuba achir aser ano parnok dak tajung kaji parnoki parnok peria chir külena ayoktsüsa züsenteter. Aji oda, Khonoma nungertemi dang masü saka Angami nungerbo ajaki lasüing lu tilalabosa ayimer, kechiyong lasüing medeniang parnok chi mechiyonger. Item lasüing lu ayimertem rongnunga nungtugu akümtsüsa Khonoma nungertemi lasüing benjong ayongzüktettsüsa lasüing lu yimtetbaji asenok asoshia tangazüksü lesson tajung ka asütsü, kechiyong mapa tulu tila ta masü, office mapa, alu mapa ta masü parnokibo kechi mapa inyakdir inyakaka kanga nendaka inyaker. Aji oda, Khonoma yimtak mapa kecha mashi mesüra mapa teinyaktsü maka ta asüba nisung kata mangutsü. Parnok ajaki tsük lu (tzülu) ayimer, anungji parnok asoshi tsümar jang alia chiyongbaji maksü lir. Parnokbo ano tsülu denji kari aonsutsü lu ayimtsü, kari nashi aser sü dena shiruru metsütsü, kari süng mapa aser kari long mapa ta shinga azünga mali mapa inyaker. Ano yimten tsütsüsa Naga yimten asoshi akanga nokdakertemji parnok lir. Asenokibo British nungertem jaok saka parnokibo British nunger aruba anema nokdak. Iba ama yimertemji tanü tashi tangatet, tasü tait aser meranga inyakertem lir. Taküm küm parnoki lasüing benjong ya March 14 nü nungi ayongzüka among aser iba benjong mapang kisüing nung lasüing ayokba sen ajak agi lakh terti shi liasü. Lasüing ayoktsü atema parnok kecha tebilemstsü mali saka aginüa aser alinüa bushia arurtem peridaktsüsbajiang parnok asoshi tebilemstsü lir. Iba ama osang angashi dang, asenokia erem mongmong, süngmok lasüing, bengana, gopi, manü, nübang, rübo aser nüoshi züsenteta benjong ayongzüksü bilema inyak nung ajungtsü. Atangji, nisung kati alu tuluka meyimtettsüsa akok saka asenok ajaki pei pei yari aonsutsü lutemji tilala yimra, asenok lu ajak senteperbo alu tuluka asütsü aser item lu nung züsentetbaji tesem ka nung bendener ayokba benjong sentong ka asenoki tangartema jaoka ayongzüktetra, asenok pei pei lu nung aonsutsü terara züsentetbaji pei chir tanünga meyoktet shitokdaktsüba melena to asenok dangi tangar talii arutsü. Tanü putu nung yabo angati anguba kecha mali, o jembiba aser ken atenba ajak ya tayokba oset ka amato kumadokogo. Iba ama putu ka nung asen tsüki nung jubi tera züsentetbajia sen akümer. Aji oda, asenoki kecha mayokyonga asenok nungdakbo ajak alitsüsa akümer, anungji asenok ket nung tayoktsü kecha maka saka nungdak ajak tangar dang nungi alir ta aliba kibong aser yimkongji tangar lar lir. Atangji, tanü asenokbo iba alar tia nungji lir. Iba alar tia nungi tangari asenok mechioktsü saka asenoki asenoksasa adoktettsüla. Ibaji asenoki asenoksasa aseni akok mapa inyak tenzük nung dang asenok alar masü kibur kumadoktsü. Idangjibo asenokia benjong kabo ayongzüktettsü.

OLEMSABANG

YA SHINER

~ T.Lima Jamir, Soyim Aonglenden Ungma, Artang Ward

Tamasa Ao kin dang ya shiner, pei tetsü oshi angazüksüji Laishiba ya lir, aji asünung Sunday School tesayur aser Child tesayur ya kanga dang tongtipang ta nibo bilemer aser angazükdaktsütsü dang masü saka züludaktsütsü merangtsüla. ABCD nungi abcd züludaktsüba nungi koba oren aser koba line nung koba zülu nung tuluba agitsü koba zülu nung tilba agitsü item ajakji tesayurtemi rasaa ashitsüla. Tar nunger otsü tu ano ken lephsia bener arua item otsütem tu adoktsü nungbo asen chirnurtemi angazüksü aser züngtetsü aser zülutetsü, anungji Ao Senden aser AKM-i asen chirtem ajungtsü asoshi mapa agi inyakdaktsüner. Iba den külemi Ao, Nagamese, Hindi aser English agi adoksüba tua ano ken lepa bener arutsüla, yamaji asü nung dang asen chirnurtem bendang lima balala nung alidang Hindi jembitsü, Nagamese jembitsü aser English jembitettsü, anungji taoba mapang tu ano ken lephsia bener arutsü merangangma, Kidang asen tsüraburtemia yamaji sayutsüla aser angazükdaktütsüla. Akidangbo class V tashibo English subject 2 dak alaka pei tetsü oshi agi dang zünga aser zülutepa aru, yamaji akidang tar nunger otsü tashi adoka züngasa aru. Temeim asen Ao kin sangertem aser Nagaland telongtet nung aliba kin balala nung alir nütsüing nübur tajungtem, tangari asen Naga nunger taküm kwi tepsetogo ta bilemer, bilemdangang. Pei kidang kinunger den külemi chiyonga lia kimalen nung jazüka anir oa tepseta yutsür aoba aser kinungertemi ngua tepseta yutsür aoba tu shirnoki ta bilemer, asen Aortem danga mezüngdangteti tepsetba tu bilemdangtsüla masü no? Nagaland telongtet nung alirtem dang parnok kichisa lemteta yur asenok dang mashir aser kechi tebilemba nungi Mon district nung alir yimtsüingtem longjemer India GOvt. dang tejashi sayua kakat nung o zülu balala zülur longkak aita lenmang nung jajabaji taoksatsü. Atsü atsüdanga aobaji nala-ang tilaka ludanga aoba mesüra long kar azünga aoba mesüra yinzü ka ana agi mesangdanga aoba item ajakji atsü atsüdanga aoba den saku lir. Anungji asen Naga nunger tajungtem asen lima ya kümzüka ayutsü asoshi wakuji ken yutsür asen Naga nunger temzüng kechisa lir item ajakji benteta renema yur külen dang India den jembishinü akatsüla aser ken o tasenbo mejembitsü merangangma. IM pur telok dang nungibo asenok Nagaland telongtet nung alir linük meimer telok timba asünung nenok ajak ka kuma longjemer opang ka sür India Govt. den akok tashi jembitsü merangangma aser asen Nagaland telongtet nung alir nütsüing nübur ajaki tangar jaklaliru meteta alitsüla.

NAGA NUNGER POLITICIAN-TEM TANGATETBA MELENSHITSÜLA

~ L. Kika Pongener.

(Yashi adok nungi)

Anungji, jokorla, asen Naga nunger Politician-tema, Election-i ayiba ya sen bushiba luyim ka amai angatetba ya endoktsüla aser tanga State nung alir Politician-tem amai....Ni kü rongsen, nubur, shisatsü aser mapang ajunga ozü lima aser nubur asoshi tenla agüja....Ni Election-i ayitsü aser nuburi ni shimtetra aser rulling sorkar nung liaka, mesura opposition nung liaka....Ni ozü lima aser ozü nubur asoshi mapa tajung inyaktsü ta temulongtetba tulu alitsüba mapang kati menepogo....ta bilemer. Anungji Naga nunger Politician-tem ajaki Election-i yir adoker MLA/Minister kümer takar kuma senchi-semnur tashi jangradema alitsüba iba tangatetba yabo joko melenshitsüla. Aji oda, pei akaba rongsen, nubur shisatsü, mapang aser pei sempet tajungtiba agi nubur tenzüktsü temulongtetba akaba Politician kar danga adokra, asen Naga lima-a tangar lima amai terabosa renloka tejakleni aotsü sudi ta nubur aikati bilemer.

Ano asen Naga nunger nuburtem-ia Election ya sen aadak/ aayangdak lenmang tajung ka amai bilemba....Pei vote sen dalang agi ayoktsüba....Iba tangatetba shisatsü yabo joko endoktsüla. Election aruba shia Candidate-tem dang sen meshir, ki yanglutsüba, Gari alitsüba, TV/Fridge/Washing Machine etc. alitsüba sen bendentsü tebilemba....ibala tangatetba shisatsü yapo joko endoktsüla. Talisa, asen Aotsür Aor tashitemeteter kin, tejakleni aoba kin aser nuchi akümba kin ka ama, iba tangatetba shisatsü temesu/tangatetba tila aser nukjidong tamajung yabo joko melenshitsü mapang tongja-tongogo. Asenoki tejakleni aoba kin ka aser nuchi akümba kin ka ama iba tangatetba temesu ya joko melenshidi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Myanmar nung sepaitemi ano Tenla ki ka rongdoktsüogo



Myanmar kübok Kachin state nung aliba St. Patrick Tenla ki tamalen tangokba noksa nung angur.

March 24, 2025: Tang tesüsa Myanmar nung sepaitemi Kachin state nung aliba St. Patrick Tenla ki rongdoktsüogo, ta osang ka ajanga metetdaksü. March 16, 2025 nü State Administration Council sepaitemi Diocese of Banmaw indang St. Patrick Tenla kidangji mi senokja liasü. Arogo nüngja St. Patrick anogo amongtsü anogo ishika dang lia sepaitemi iba Tenla ki mitsü küma rongdoktsüogo. Khristan melungtet telok Christian Solidarity Worldwide (CSW)-i, Myanmar nung sepaitemi Khristantem kanga

amaker aser Arogo kiojen raksatsür, ta metetdaksü. February 26 nüa sepaitemi putir ka meyong ki, Arogo office aser high school ka rongdokja liasü aser February 6 nüa sepaitemi anünglen nungi amakdang Chin State nung aliba Sacred Heart Church Tenla ki raksaja liasü. March 3 nüa sepaitemi bomb amshia amakdang Kachin state kübok St Michael's Catholic Church nung aliba Pastoral Centre raksatsü. Myanmar nung takoksa angurtemji Khristantem dang masü. March 16 nü sepaitemi

anünglen nungi Buddhist monastery ka amakdang Buddhist putir trok densema nisung 9 tepseta liasü. 2023 küm nungi tenzüka sepai yimsüstüba anema lisopur telok balalai sepaitem den rarar. Myanmar nung Tenla ki aika raksatsüogo/rongdoktsüogo, talisa Khristan nütsüng aika aliba state tem nung sepaitemi ki-a aika rongdoktsüogo. CSW-i ashiba agi, sepaitemi Khristan nütsüng aika aliba state tem- Chin, Kachin, Karen aser Karenni State tem nung lisopur aika tepsetogo. CSW Tir, Mervyn Thomas-i, tekülem kitem raksatsüba ajanga sepaitemi nüburtem sobaliba aser yimsü tamendakdak samatsür, ta aitsü. Thomas-i, "Myanmar sepaitemi metetsümonga Khristantem aser tanga yimsü telok balala amakba ya meimchir temeden aser international özüngtem alema lir," ta aitsü. "Yimsü nung ajemdaker nütsüng ajema alirtem anema inyakba atema alima linüktemi ola madoki malitsüla. Takoksa angurtem nem ochi temeden agütsütsü atema inyaktsüla," ta paisa metetdaksü.

Taküm India nung Khristantem anema inyakba tatalokba 834 lir: AICU

March 24, 2025: All India Catholic Union (AICU)-i, India tesem balala nung, talisa BJP-i yimsüsüba state tem nung Khristantem anema inyakba kanga bulua akümba atema tebilemtsü akar, ta metetdaksü. Küm 106 tejaklen tentetba organization- AICU-i sangdong ka ajanga, India nung yimsü nung ajemdaker maremzüktepba kanga bulua kümдар, ta metetdaksü. AICU-isa Arunachal nung Arunachal Pradesh Freedom of Religion Act, 1978 asentenshir benoktsü merangba atema aitsü. Iba özüng ya kangshia yimsü meyipdaksüba nokdangtsü atema lir, ajisüaka AICU-ibo iba özüng ajanga Khristantemi timtem ajurutsü ta bilemer. AICU otongdari, "Küm 47 sülen iba özüng asentenshir benoktsü merangba atema onok jashir. Iba ya ajanga putu aika yimjung nung lia aruba tribal telok balala tsüngda telemsa adoktsü aser Khristantem taliba sendoktsüa akok," ta metetdaksü. AICU-isa Madhya Pradesh state nunga Chief Minister Mohan Yadav-i anti-conversion özüng yanglushitsü atema benokba asoshi tebilemtsü akaba lemsatep. Iba özüng tasenba kübok tetsürtem yimsü meyipdaksüra aibelenertem nem tasüba temerenshi obendang agütsütsü. AICU-i, "Tamangba yimsü meyipdaksüba atema tasüba

temerenshi agütsütsü benokba ya özüng kanga tesashi. Iba ya nija ka yimsü temeden anema lir. Iba özüng ya ajanga minorities, talisa tetsürtem taliba sendoktsü," ta metetdaksü. AICU-i, 2024 küm Manipur nung President's Rule benokba sülen nisung 60,000 dak tali jenshiogo aser parnok teimbaka lisopur minorities lir, ta metetdaksü. AICU sangdong ajanga, "Tang Manipur nung tensa kanga mejungi lir. Kibong meyrjang aika tejenokdak mali mesüra teyari mangur. Parnok yaritsü atema sorkari rongdak süa inyaktsüla," ta metetdaksü. AICU-i ashiba agi, taküm küm tenzüker tang tashi nung India tesem balala nung Khristantem anema inyakba tatalokba 834 lir; talisa Uttar Pradesh aser Chhattisgarh na nung loktii Khristantem amaker, loktiliba nungi sendoker aser amokmerener, ta metetdaksü. "Takoksa angur aikati tetsübu nung item ama osang melemsateper. Aibelenertem nem temerenshi magütsür aser aikati ola madoker," ta sangdong nung shia lir. "Item ama tatalokba liaka India nunger teimba kati yimjung aser telongjem pusemer. India nunger teimba kati item tesempa mapa maginer. Yimsü alia amanger telok kari tetsübu aser telemsa proker," ta AICU-i metetdaksü. AICU-isa Centre aser state

ANOGO ABEN TSÜNGREM DEN

Kishizüing nung temenen monga lir

Nai tajung benshirabang na magizüktsü ama? Aser nai tajung mebenshirabang kishizüing nung temenen monga lir. Lipok 4:7.

Kodang tatitangba asen mulungjangi aiter, asenoki iba madak takok mengura, iba yagi asenok madak kibur akümtsü aser tamajung mapa dangi anitsü. Tatitang tenzüka mapang shimtetba mapangji lendong. Aika tom ta nung alir.

Tsüngremi Kain dang mepelar aser Abil dang pelar ta pai metetta liasü. Tenükmerema bilemba agi Kain mulungjang nung shisatetdaksü. Kechi inyaktsüla ta Kaini shisadanga alidang Tsüngrem O pa dangi aru. Pa mulungjang kishi züing nung temenen monga lir ta Tsüngremi pa dang tekümdangtsü ashi. Tang temenenji zübazüba agitsüba masü, temeneni kecha tamajung meinyaktsü ta bilemtsüba masü. Tang temenen madak takok angutsüba mapang aser toktsütsüla. Kaini temenen madak takok mangu, temeneni takok angu aser pa taküm raksatsü.

Meimlaba mapang nung tatitangba arur. Tenük merem agi ne mulungjang amaktsü tenzüker. Ne tebilemba aser mapa nung Tsüngremi mepelar ta Tanela Temeshi-i ne mulungjang nung zülur. Iba mapang nung ne mulungjang nung temeneni akoshiba koktettsüla. Temeneni raksatsür, temeneni tasüba bener arur. Temenenji kazütsü oset ama mamshitsüla. Kain nem agütsüba kasa tekümdangtsü Tsüngrem Oi ne danga ashir. Ne mulungjang kishi züing nung temenen monga alibai ne dangi teraksa bener marutsüdang aji koktetang. Pai ashiba nung temulung agüjang aser nai na asoshi aser tangar asoshi timtem paidoktettsü.

KABA nung Lanujen Waden sentong agi



Kohima, Metsüremi/ March 24 (TYO): ABAM Literature & Education Ministry ajanga 2023 nungi "Lanujen Waden" sentong "Kümdangdi" Kolosi 2:8 omen sür agia aruba tatembangbuba Zone 8 & 9 asoshi Kohima Ao Baptist Arogo (KABA) nung Metsüremi 21-23, 2025 anogotem nung kanga temoatsü ngua agia tembangogo, ta ABAM Officiating Executive Secretary, Rev. L. Yapang Mollier-i sangdong ka nung metetdaksü.

Iba sentong ya tanü Children Ministry, ABAM aser tanurtem dang tekümdangtsü Mr. Imsentiba Jamir, lenmang mesayura tarutsü tia Coordinator, Sunday School tamajungba kati meneptsü Ministry nunger liasü. Ajer agi Arogo 28 nungi tesayurtemi anir tanurtem 726 arua iba sentong nung dena liasü. ABAM ajanga Kohima Ao Baptist Arogo dang iba sentong achaayangba asoshi kanga pelaba lemsateper. Maneni Lim Arogotem nung tanurtem wadang inyaka aodang Tsüngremi bendanga agütsüba lanur tajung jenti adokdakjang ta sarasademer.

AO OSHI ANGAZÜKDAK:**TANÜ ANGAZÜKTSÜBA OJANG****Telongka**

(v) junga metangtetba süngjang, tetangpet (poor fruiting)

* Tzünglu maruba agi süngjang ajak telongka aküm.

Telongso

(adj) lokti adenshia pelatepba (crowd celebration)

*Telongso dak aiben tashidaka menateper.



Tir Yimyim

OLONG PAITEP # 7101

1			2		3		4		5
6		7							
					8				
9				10					
						11			
			12						13
	14							15	
					16				
			17						
								18	
19									

TIPIEN

2. Teburtemi tejak nung awaba
6. T ___ em
8. Tzüak ayudak
9. Nüngdakba dang timba
11. Züina ao
12. Yangi tzu angur
14. Tangar dang nungi tali
16. Senyong masü
17. Oadokdi
18. Tzü tarok
19. Yimtaklir aikati iba ya ki den
külemi yanglusemer

LANGTSÜNGLEN


1. Temejangdak
3. Nisung ka mapa inyaksü nübo
4. Azüntsü asoshi mejemba
5. Tesangwa agütsüba
7. Tila masü
10. Tebenjem tetsür chanu
11. Tekolak nung inok
12. Tetsüngda
13. Tangar inyakba ka inyak
14. Tim masü ta ashi
15. Asalendong
16. Tanü dangtsü

OLONG PAITEP # 7100 TELANGZÜBA**TIPIEN :**

1. Telok, 4. Aluru, 6. Ozüing,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzük,
11. Teronem, 12. Sempa,
13. Jahaz.

NAI-A YA METETTER MA

Guwahati nung March 26 aser 30 anogotem Indian Premier League (IPL) 2025 cricket matches asayatsü aliba atema Guwahati Traffic Police-i traffic regulations kar metetdaksüogo. Assam Cricket Association Stadium, Barsapara, Guwahati nung IPL asayatem asayatsü sentong lir. Guwahati Traffic Police-i tanurtem, kaketshirtem, teintet rogotem aser matamabensarterm asoshi bilema traffic tetuyuba agütsüogo. Ajsüaka iba tenokdangba ajanga Fire Tenders, Ambulances, Life Saving Drugs, Vehicles carrying Oxygen Cylinders, School Buses, local residents asoshi emergency vehicles nem timtem kecha magütsütsü.

Assam Dy. speaker dak teka sangshiba atema mepetemesü adok**Guwahati, March 24, 2025**

(Agencies): Congress MLA kati Deputy Speaker Numal Momin amak ta asüba ken o atema BJP MLA aser opposition MLA tem tsüngda rarabangsen adokba ajanga Assam Legislative Assembly Speaker-i session anen.

Congress MLA Nurul Huda-i Hombarnü Deputy Speaker Numal Momin dak kima nung teka sangshi ta ruling BJP-i opposition party dak tai tongloktsü.

Iba ken o ajanga Assam Assembly züngsemtem tsüngda rarabangsen adoka liasü.

BJP MLA Rupjyoti Kurmi anema Congress MLA temi Hombarnü Assam Assembly telungi süoshi tanak agir aru.

MLA Kurmi-i taoba hopta opposition MLA dang o tamajung ashi aser teka

sangshitsü meranga liasü.

Congress MLA temi Assembly building nung Speaker indang chamber kima nung Kurmi anema meneer lungkak aitba sentong ka agia liasü.

Tanü question hour mapang Momin-i pa dangi WhatsApp nung osang ka yok ta Assam Chief Minister-i ashi.

Nurul Huda-i Momin dak teka sangshiba ajanga pa mozü kidangi anir oa anepalu ta CM Sarma-i ashi. Paisa Speaker dang iba lendong ya House kima nung atalok anungji police tsüngdang ken o ka benoktsüla ta ashi.

Ajisüaka, Leader of the Opposition Debabrata Saikia-i CM Sarma onük magizük aser House Committee ka nem bushisüngdang südaktsütsü takhangba agütsü.

Tanü Congress, AIUDF aser

CPI(M) züngsemtemi House tiyongtsü nung adenshir lungkak ait. Parnoki Kurmi aitsüba den ruling party-i Momin dak teka sangshiba onük magizüki asaten.

Sarma-i ruling party MLA tem anir opposition-i lisopur Momin dak teka sangshiogo ta meyiper toktep.

"Iba ajanga inyakyim tamajung ka tenzüker kechiyong opposition-i lisopur ka dak Assembly complex nung teka sangshi. Iba ken o ya tulu ka lir" ta CM Sarma-isa ashi.

Iba atema Speaker Biswajit Daimary-i ketdangsürtem dang iba tatalokba reprangshimtsü aser Assembly Secretary-i Momin osang metetpelatsü tetuyuba agütsü.

Ajisüaka, assembly nung tensa mejungi akümba agi Speaker Daimary-i senden minute 10 atema athi.

Guwahati HC-i USTM Chancellor Hoque nem bail temelaba agütsü**Guwahati, March 24, 2025**

(Agencies): Gauhati High Court (GHC)-i University of Science and Technology, Meghalaya (USTM) Chancellor Mahbubul Hoque nem bail temelaba agütsüogo.

Dhekiajuli police station nung ken o benoka aliba atema GHC-i bail temelaba agüja liasü.

Okadaki tan agi ken o pungububa nung Mahbubul Hoque nem bail temelaba agütsür.

Taoba nung GHC-isa Patharkandi nung ken o ana

benoka aliba atema Mahbubul Hoque nem bail agütsü. Okadakisa Kokrajhar, Barpeta, aser Goalpara nunga ken o benoka alibatem asoshi bail temepishiba agizükogo.

Guwahati police aser Special Task Force (STF) külem telok kati February 22 nü Guwahati nung Hoque den Patharkandi nung school tesayur 5 tashi apu.

CBSE Class 12 Physics examination nung Hoque-i tim masüba mapa inyaksü atema süpokrem meshia agi ta tai

tonglokja police-i Hoque apu.

Sribhumi district kübok Kendriya Vidyalaya nung kaketshir 274-i Physics tatidang agütsü. Kaketshirtem ya iba school nungi 45 aser ERD Group (Haque ajanga ketdangsüba foundation) nungi 214 dena liasü.

Tesayurtemi tanga district tem nungi kaketshirtem Class 12 CBSE board tatidang nung marks aika agütsütsü ta nangzüka liasüta ketdangsürtemi tai tongloktsür.

**GOVERNMENT OF NAGALAND
DIRECTORATE OF WOMEN RESOURCE DEVELOPMENT
NAGALAND:: KOHIMA.**

NO.DWRD/DEV/MTC-4/2021**Dated Kohima, the March 2025****ADVERTISEMENT**

The Department of Women Resource Development invites female applicants who are willing to undergo training under the following trades during 2025-26.

A. 1. Cutting & Tailoring: under Multi Training Centre (MTC) Kohima

1	Course Duration	April – November (8 Months)	Intake Capacity
2	Eligibility Criteria	Class VIII Passed Age : 18-35 (as on 31 st March 2025)	20

2. Knitting : under Multi Training Centre (MTC) Kohima

1	Course Duration	April – November(8 Months)	Intake Capacity
2	Eligibility Criteria	Class VI Passed Age : 18-35 (as on 31 st March 2025)	5

3. Baking & Confectionery : under Multi Training Centre (MTC) Kohima

1	Course Duration	April - June (3 Months)	Intake Capacity
2	Eligibility Criteria	Class X Passed Age : 18-35 (as on 31 st March 2025)	6

4. Hairstyling : under Multi Training Centre (MTC) Kohima

1	Course Duration	April - June (3 Months)	Intake Capacity
2	Eligibility Criteria	Class X Passed Age : 18-35 (as on 31 st March 2025)	6

B. 1. Cutting & Tailoring: under Multi Training Centre (MTC) Dimapur

1	Course Duration	April – November (8 Months)	Intake Capacity
2	Eligibility Criteria	Class VIII Passed Age : 18-35 (as on 31 st March 2025)	13

2. Knitting : under Multi Training Centre (MTC) Dimapur

1	Course Duration	April – November(8 Months)	Intake Capacity
2	Eligibility Criteria	Class VI Passed Age : 18-35 (as on 31 st March 2025)	7

NB:

1. Last Date of Submission of Applications in all the Category : **4th April 2025**

2. Date of Interview : **9th April 2025**

3. Application shall be received on first come first basis in the intake ratio of 1:5 in each course.

Applications addressed to the Director, Women Resource Development in plain paper stating bio-data, 2 (two) recent passport size photos, self-attested copies of the relevant marksheet, birth certificate and any other relevant documents are to be submitted.

For Training under Multi Training Centre(MTC) Dimapur, Applications are to be submitted to Officer i/cMTC, Purana Bazaar, Dimapur.

**Sd/-
(VILONE SAKHRIE)
Director.**

US-i anüing ajanga Yemen kübok tesem balala amak

Sanaa, Metsüremi/March 24 (Agencies): United States-i manger mesangwa tsüingda Yemen kübok tesem balala makogo, aser iba mapang linük yimtiba Sanaa nung nisung ka tepset aser nisung 13 yiruja liasü, ta media sangdong balala ajanga metetdaksü.

Washington-i asendenshir Yemen nung Houthi telok tamendakdak amakba mapang Hombarnü tesüsabuba iba telok makogo. Gaza Strip-i teyari bener me yoktsü atema Israel-i tenokdangba agütsüba atema Red Sea nung Israel den sendaktepa aliba rongtem amaktsü ta Iran den sendaktepa aliba telok yagi metetdaksüba sülen US-ia parnok anema jenjang agi tenzükogo.

"US-i tatemsa Sanaa kübok Aser tesem nung nisung aliba ki ka amakba sülen lisopur ka tepset aser tangar 13 yirua liasü, kong tanur asem densema lir," ta Houthi indang Health Ministry otongdar, Anees Alasbahi-i ashi.

Houthis puri lemsatepba video ka nung ki ka chireper aliba aser ali nung azü yangshir aliba sayuogo.

Houthis purisa, Saana yimti temeket nung tesem balala, Red Sea port yimti Hodeidah aser Marib province kübok tesem balala anüing ajanga amakba metetdaksüogo.

Social media accounts balala ajanga Hombarnü Houthis puri US navy rongtem amak ta metetdaksüogo, ajisüaka osang tejangja memetet.

US-i March 15 nü nungi ano anüing ajanga Yemen nung amendaker aliba iba telok ya amak tenzükogo. Houthi teloki Red Sea aser Gulf of Aden nung Israel den sendaka aliba rongtem amaktsü ta ashiba den Israel den rara nung Hamas pur yaritsü tenangzükbaga agütsüogo.

January ita Hamas aser Israel na ceasefire atema nangzüktepba sülen Houthis puri tzüyim nung rong balala amakba aser Israel amakba anena liasü. Ajisüaka ceasefire atema nangzüktepba chirepba sülen iba telok yagi maneni Israel amak tenzüksü amokmerena liasü.

National Security Advisor Mike Waltz-i Deobarnü ashiba agi, Houthi puri amokmerenba ajanga US wako songer aliba

rongtem shilem 75 Suez Canal ajanga aotsü melena Africa mekena aotsüsa akümer.

Houthis purisa tawa Israel dak rangloker amakba nangzükogo. Israel military-i Deobarnü ashiba agi, Houthis puri khaloktsüba ballistic missile ka parnoki takok ngua nokdangtetogo.

Taoba Brehostibarnü nungi Hombarnü tashi nung US-i Yemen kübok Houthi telok tamendakdak balala amakba mapang nisung 79 tepsetogo aser nisung 100 dak tema yirutsüogo.

Tang asendenshir Yemen kübok tesem balala amakba indang US-i osang tejangja agüja mali aser parnoki anüing ajanga Sanaa amakba indang kecha memetetdaksü.

Defence ketdangsür kati AFP news agency dang ashiba agi, "CENTCOM-i [US Central Command] Yemen nung Iran-i teyari agütsüba Houthi pur tamendakdak balala anogoshia aser aonungshia makdar."

Waltz-i ashiba agi, tawa tesem balala amakba mapang Houthi lenir tongtibangtem tepsetogo, kong parnok indang missile programme tekolakba densema lir.

"Onoki parnok indang headquarters makogo," ta Waltz-i ashi. "Onoki communications nodes, prangbong injang aser hadir balala yangluba factory tem aser drone yangluba tesemtem dena makogo," ta paisha shisem.

Ajisüaka US-i, parnoki Yemen nung military tamendakdak amaker ta ashiba ya teyazü ta Houthis puri shiogo.

Yemen nung Houthi sorkari ashiba agi, "noksa, scene, kuli, asürtem, aser lendong nungi jenbortem kuli balala ajanga parnoki nüburtem aliba tesemtem aser tai maketba civilian tem amaker ta jangaago aser iba ajanga US-i peisasa kümzüka ayutsü makokba civilian tem taküm agiba aser ozü nüburtem inyakyim raksatsüba kuli tejangja agütsür."

Maneni Houthi teloki ashiba agi, US-i tawa parnok amakba ajanga parnoki Gaza nung Palestine nung pusemba nung kecha tetsükdaksü madoktsü aser parnoki nüngdak dang süra Lebanon aser Hezbollah dena yaritsü.

Tepuokdak alisang Imamoglu ya Turkey opposition tir candidate asütsü shimogo

Istanbul, Metsüremi/March 24 (Agencies): Turkey indang opposition party tuluba CHP ajanga presidential primary ayongzükbaga nung tepuokdak yua alisang Istanbul Mayor Ekrem Imamoglu nem vote million 15 jungnüa agütsüogo, ta municipal ketdangsür temi ashir.

Linüki bhukumba tali akumba temaitsü ka ama iba party yagi Hombarnü sangdong ka nung ashiba agi, par züngsem 1.7 million den party masüba züngsem million 13-i taruba tir election nung Imamoglu ya tir candidate kumdaktsütsü mulungogo, aser iba election ya 2028 nung agütsü.

Turkey Tir Recep Tayyip Erdogan den tokteper rongnung Imamoglu ya tejangja nübu ka asütsü ta nüburtemi repranga alidang Bodhbarnü pa apuba ajanga linük nung nüburtemi longkak ait tenzük. Deobarnü pa tepuokdaki yokba ajanga mepetmesü tali akum.

Erdogan anemer temi election aruba mechi Imamoglu ya apu ta aitsür. Nüburtem jenti aruba ajanga voting ya ghonda asem ser tesadang agi atsülanga liasü.

Erdogan'er sorkari Imamoglu ya yimtenren tsütsü nungi apuba asü aser Turkey indang courts ya temeja lir ta



nenshia ashir.

"Ekrem Imamoglu atema ozü züngsem aser temeimer temi vote agütsüba ya million 14 aser me yirijang 850 lir. Tanü iba voting results ajanga Erdogan inyakyim nung temulung malemba sayur. Asenoki tokteptsü!" ta CHP chairman Ozgur Ozel-i X nung ashi.

Imamoglu ya taoba hopta pua ochimashi ken o mejembi yur tepuokdak ayutsü Istanbul court ajanga Deobarnü obendang agütsü. Court yagi anti-terrorism ken o ka magizük.

Imamoglu ya Istanbul indang Silivri district anasa Marmara Prison-i Deobarnü bener ao. Pai item taitzüba kata magizüker aser linük ajunga nung longkak tali aittsü ayongzüker.

Primary nung otsü yanglua shilem agiba ajanga ni kanga pelar, ta Imamoglu-i tepuokdak nungi sangdong ka agütsü.

Sorkari social media X nung

accounts noklang aika shibangtsü totuyuba agütsüba asoshi Ozel-i sangdong ka nung ibai sorkari opposition ola nembangtsütsü meranger, ta aitsü.

Turkish Information and Communication Technologies Authority ajanga news organizations, osangbener, yimten yimsüsür, kaketshir aser dangar indang accounts 700 dak tema shibangtsütsü court totuyuba balala agütsüba atema Elon Musk me yong company-i aitsüogo.

Ajisüaka parnoki opposition den sendaktepa aliba account ishika shibangtsüogo aser item ya longkak aittsü sentong ayongzükbaga university activists tem indang lir ta Politico ajanga ashir.

Deobar aonung Istanbul aser Ankara nung longkak aiter temi police den raratepa liasü aser nisung aika puogo.

South Korea court-i PM Han Duck-soo nem tir menden meyipa agütsü



Seoul, Metsüremi/March 24 (Agencies): South Korea indang constitutional court ajanga Ato Kilonser Han Duck-soo impeachment agientsü aser pa nem linük indang acting president menden tanaben agütsüogo.

Taoba küm December ita Tir Yoon Suk Yeol-i martial law sangdongba sülen parliament-i pa mapa nungi anenja ken o benokba mapang Han nem khen atema tir menden agütsü.

Ajisüaka Han ya hopta ana dang tir inyaker ozüing yanglur temi pa mapa nungi anentsü. Iba sülen South Korea ya

deputy prime minister Choi Sang-mok lenisüba nung arur.

Yoon-i martial law benoktsü merangba sülen South Korea nung yimten yimsüsüba nung mangatettep tulu adoka lir.

Acting president mapa agizüker mapang tatsüka tsüngta Han-i constitutional court nung obendanger tasen shimba nokdang - koba ajanga Yoon anema ken o benoktsü lenmang temesüba akumer ta opposition temi imla.

Iba yongji parnoki Han ya anentsütsü vote agütsü. Ajisüaka Hombarnü obendanger ti rongnung par tenet-i iba impeachment agientsütsü mulung.

Iba obendang sangdongba sülen, "Constitutional court ajanga shisa taka telemtetba agiba atema kanga pelar. Sorkar yimya shidak inyaka aotsü atema ni mapa inyaktsü," ta Han-i ashi.

Ano kasa court ajanga Tir Yoon menden nungi atsüngdokba indang telemtetba agütsü lir.

Ozüing yanglur temi December 14 nü Yoon mapa nungi atsüngdoktsü vote agüja liasü, saka tatem nung constitutional court ajanga telemtetba agütsü.

Court yagi Yoon aitsüra pa tir menden nungi idangjisa atsüngdoktsü aser South Korea nung anogo 60 tsüngta tir election agütsü. Aser pa medentsüra Yoon ya itangjisa tir mapa inyak tenzüksü.

Yoon indang ken o nung obendang agütsütsü atema court-i anogo lateta mali, saka hopta ishika Seoul nung Yoon bhukumer aser anemer temi longkak tali aita arur.

Han mapa nungi atsüngdoker aliba agientsüba ajanga constitutional court ochi nung nokdaka lir ta sayuner ama ajiteter.

GOVERNMENT OF NAGALAND

DIRECTORATE OF SCHOOL EDUCATION

NAGALAND : KOHIMA

CORRIGENDUM

Kohima dated the March 2025

No. ED/EST/GR-IV/SDEO-TSMYU/2022: In partial modification to this Office Advertisement No.ED/EST/GR-IV/SDEO-TSMYU/2022/283 dated 24-02-2025 and No.ED/EST/GR-IV/SDEO-TSMYU/2022/29 dated 05-03-2025, the date of interview for the 2(two) posts of MTS at GHS Sendenyu and SDEO Office Tseminyu to be held at the Directorate of School Education on 26-03-2025 is postponed to 28-03-2025.

(THAVASEELAN K) IAS
PRINCIPAL DIRECTOR

FARM AYIMTSÜ ALI AYOKER

Bordering Longpayimsen & Aosenden Village
10 Acres / Bigha @ Rs. 5 per sq. ft. (Negotiable)
Road touch / Near water source. Mob : 7005588589

Djokovic ATP Masters 1000 asaya timtiba akokba asayar kümogo

Metsüremi/March 24, 2025

(Agencies): Miami Open tebur kija asaya nung Novak Djokovic-i Argentina nunger asayar Camilo Ugo Carabelli akokba sülen pai Spain nunger asayar Rafael Nadal ajateta otsü tasen ka yanglua ATP Masters 1000 asaya 411buba kokogo

Grand Slam 24 koker aliba asayar yagi Lucky Loser Carabelli ya 6-1, 6-0 agi koka liasü.

Iba asayamung metenzük tsüngda Serbia nunger asayar yagi Masters 1000 asaya 409 koker liasü aser pai Nadal asaya ka agi dang memenepi liasü. Mezüngbuba round nung pai Rinki Hijikata akokba sülen Nadal (410) den kasasa kuma liasü.

Djokovic shiba Masters 1000 nung title (40) timba abenba, final (59) timba atongba aser semi-finals (78) timbaben atongba asayar lir pai Deobarnü Masters 1000 nung asaya 411buba koka Nadal ajateta iba asayamung nung asaya timba akokba asayar kümogo.

"Ano alizüng tasen ka tongtetba aser otsü tasen ka



yangluba atema pelar. Ni asayaba shia langkabosa ajangzüksü alir aser iba ajanga asayamungtem nung ni junga asayatsü ajungmsor," ta Djokovic-i ashi.

Küm 20 tejakdang Masters 1000 asayamung ka nung mezüngbuba asayaba sülen Djokovic-i asaya 411buba kokogo. Taoba mapang No. 1 asayar yagi 2005 kum Paris nung mezüngbuba takok ngua liasü. Pai Victor Hanesu tsükdaksü.

Iba sülen arishi kum 37 tain asayar yagi Masters 1000 titles 40 benogo. Pai mezüngbuba Masters 1000 asayamung ya

2007 kum Miami nung koka liasü. 2018 kum pa ya Masters 1000 events teku prongla akokba asayar mezüngbuba akum aser pai kijai dang iba ya ajangzükteta lir. 2020 kum tashi nungbo pai asayamung ajak ya anabenbenbo koker liasü. pai tang tashi nung asaya 411 kokogo aser asaya 91 nung tamakok nguogo.

Djokovic Miami Open round of 16 nung arishi kum 23 tain Italy nunger asayar Lorenzo Musetti den asayatsü.

2023 kum Paris nung takok anguba sülen Djokovic-i tang tashi nung Masters 1000 title ka danga bena mali.

BCCI-i tetsür asayartem central contract sangdongogo

Metsüremi/March 24, 2025

(Agencies): India tetsür team captain Harmanpreet Kaur, vice-captain Smriti Mandhana, aser all-rounder Deepti Sharma nunger maneni Grade A nung züngoksema lir, koba BCCI-i agütsüba central contract tem rongnung ajak dang temaba lir.

Pacer Renuka Thakur, all-rounder Jemimah Rodrigues, wicketkeeper Richa Ghosh, aser opener Shafali Verma nungera Grade B nung lir.

Left-arm spinner Rajeshwari Gaikwad, shiba taoba kum Grade B nung liasü, la takumbo züngoksema mali.

Lanur off-spinner Shreyanka Patil, pacers Titas Sadhu and Arundhati Reddy, all-rounder Amanjot Kaur, aser wicketkeeper Uma Chetry nunger nem tang mezüngbuba central contract agüja parnok Grade C nung züngoksemogo.

Parnok den ano Yastika

Bhatia, Radha Yadav, Sneha Rana, aser Pooja Vastrakar nungera Grade C nung züngoksemogo.

Kasa mapang nung Meghna Singh, Devika Vaidya, Sabbineni Meghana, Anjali Sarvani, aser Harleen Deol nunger nem takumbo central contract magütsü.

BCCI indang contract structure kübok Grade A nung aliba asayartem nem sen lakh 50 agütsür aser Grades B aser C nung aliba asayartem nem sen lakh 30 aser lakh 10 agütsür. Iba den bendenloksema asayartem nem match fees dena agütsür.

India tetsür team takum kum tatemlen linük nung ODI World Cup asayatsü lir. India nung sempet tajung aketba tetsür asayartem aika lir, saka tang tashi nung India tetsür team-i asayamung tongtibang ka danga koka mali.

Juventus-i coach Motta mapa nungi anentsüogo



Metsüremi/March 24, 2025

(Agencies): Juventus-i manager Thiago Motta mapa nungi anentsüogo aser pa melen Croatia nunger Igor Tudor shimogo.

Thiago Motta shimba sülen ita teku dang lir pa mapa nungi anentsüogo.

Arishi kum 42 tain taoba mapang Italy nunger international asayar Motta ya Serie A 36 ben koker aliba team

ya league table nung tang pongububa nung aliba mapang mapa nungi anentsüogo. Parnok Champions League atema qualify asütsü asoshi point ka agi ajema lir.

Pa lenisüba nung Juventus pur tatemsa taoba hopta tatemti Fiorentina den asaya, koba parnok goal 3-0 agi mekoki liasü. Iba masüdang taoba hopta parnok kidang Atalanta-i goal 4-0 agi koker liasü.

Turin nung amendaker aliba club yagi Champions League play-off round nunga PSV Eindhoven makok aser parnok Coppa Italia nungia tsükogo, koba taoba season bo parnok koka liasü.

Kasa mapang nung taoba mapang midfield asayar Tudor-i 1998 nungi 2007 tsüngda Juventus nungi asaya 150 dak tema nung asayaogo.

Pa mezüngbuba coach mapa 2013 kum Hajduk Split nung inyak aser iba sülen Galatasaray, Udinese, Verona aser Marseille nunger nunga inyakogo.

Arishi kum 46 tain coach ya Juventus nung maden tsünga taoba season tatemlen Lazio nung ita asem inyaka liasü.

Tudor lenisüba nung Juventus pur mezüngbuba asaya Honibarnü Serie A nung Genoa den kidang asayatsü.



longjemogo. Tanabuba leg nung goal 3-3 agütsür tembangba sülen 5-5 aggregate nung asaya tembang aser penalty asayatsü sa akum. Penalty asaya ya Spain-i 5-4 agi koka liasü.

Valencia, Spain kübok Mestalla Stadium nung Netherlands aser Spain na UEFA Nations League quarterfinals tanabuba leg nung takok anguba sülen Spain nunger asayartem pelatepba noksa nung angur. Hombarnü asaya nung penalty metsütepba sülen Spain-i asaya koka semifinal-i iogo, kong parnok Germany, France aser Portugal den

Tamim temulungjang nung timtem adoka mozükidangi anir ao



Metsüremi/March 24, 2025

(Agencies): Taoba mapang Bangladesh one-day cricket captain Tamim Iqbal, Hombarnü domestic cricket asaya ka asayaba mapang temulungjang mapa minyaki kuma mozüki dangi anir ao.

Arishi kum 36 tain asayar Tamim lenisüba nung Mohammedan Sporting Club pur Dhaka Premier Division Cricket League 50-over asaya ka asaya aliba mapang iba ya ataloka liasü.

Tamim asaya metenzük tsüngda toss asayaba mapangbo shilem agi, ajisüaka mapang tatsüka lir pa teku ashi tenzük aser ibayongji ground nung mezüng temang anepaluba sülen mozükidangi anir oa liasü.

"Pa temulungjang mapa minyaki kuma liasü. Pa temulungjang tang tajung inyaksangshidar," ta Bangladesh Cricket Board

(BCB) nung medical officer Debashis Chowdhury-i ashi.

"Pa Dhaka tezülen Savar kübok mozüki ka nung temang anepaludar aser Bangladesh nungertem dang pa takaratiba nung taneptsü angutsü atema sarasadema atatsü mepeshir," ta team ketdangsür Tariqul Islam-i ashi.

Kasa mapang nung Bangladesh Cricket Board-a senden amentsü aliba thinenogo, kechiyong board züngsem aika Tamim semdangi mozükidangi oa liasü.

Tamim-i 2007 nungi 2023 kum tashi nung Bangladesh tenüng nungi format ajak nung asaya 391 nung asayaogo.

Pai international run 15,000 dak tema yangluogo aser Bangladesh nunger asayartem rongnungi pai kijai international cricket format asemprongla nung century yanglua lir.

BILEMDANGANG

"Aibelener memetongshir tanabuba aibelen menar."